



**Sud Bosne i Hercegovine**  
**Суд Босне и Херцеговине**

---

Broj: S1 3 Iž 031864 19 Iž  
Sarajevo, 08.03.2019. godine

*Sud Bosne i Hercegovine u Sarajevu, u apelacionom vijeću sastavljenom od sudija Srete Crnjaka predsjednika vijeća, Vesna Trifunović i Mirsada Džindo članova vijeća, odlučujući o žalbi političke stranke Posavska stranka sa sjedištem u Orašju, 3. ulica br. 2g, koju zastupa predsjednik stranke Ninoslav Sušilović, izjavljenoj protiv odluka Centralne izborne komisije Bosne i Hercegovine broj: 06-01-07-1-93/19 od 05.03.2019. godine, broj: 06-01-07-1-94/19 od 05.03.2019. godine, broj: 06-01-07-1-95/19 od 05.03.2019. godine o dodjeli mandata delegatu u Domu naroda Parlamenta Federacije Bosne i Hercegovine, u nejavnoj sjednici održanoj dana 08.03.2019. godine, donio je*

**R J E Š E N J E**

*Žalba se odbija kao neosnovana.*

**O b r a z l o ž e n j e**

*Odlukama Centralne izborne komisije Bosne i Hercegovine broj i datum navedeni u uvodu, dodijeljeni su mandati delagata u Domu naroda Parlamenta Federacije BiH iz reda srpskog naroda Lonić Mladenu kandidatu sa liste političkog subjekta SDP-Socijaldemokratska partija BiH za Skupštinu Unsko-sanskog kantona, Stevanović Draganu kandidatu sa liste političkog subjekta SDP-Socijaldemokratska partija BiH za Skupštinu Kantona Sarajevo i Bosnić Nikici kandidatu sa liste političkog subjekta Srpska lista BiH za Skupštinu kantona 10 za Opšte izbore 2018. godine.*

*Posavska stranka blagovremeno je uložila žalbu na odluke o dodjeli mandata delegatu u Domu naroda Parlamenta FBiH navodeći da su odluke donesene na osnovu Kriterija i postupka popune nepostojećih mandata u Domu naroda Parlamenta FBiH, koji dokument je neustavan i nezakonit. Donošenjem dokumenta grubo su povrijeđena prava Posavske stranke, njenog kandidata za Skupštinu Županije Posavske Anđelka Stojanovića, kao i Posavskog kantona. Centralna izborna komisija BiH donošenjem kriterija nije ispoštovala Ustav Federacije BiH i Izborni zakon BiH jer dodjelom mandata kandidatima sa kantonalnih listi koji nisu osvojili mandat u kantonalnim skuštinama, nije ispoštovala načelo konstitutivnosti po kome prednost u popuni nedostajućih mandata treba imati kandidat iz onog kantona koji u prva dva kruga izbora delegata u Dom naroda nisu dobili ni jednog predstavnika. Izabrani predstavnik Posavkog kantona u Skuštinu Županije Posavske Mato Rošić dana 20.02.2019. godine dostavio je Centralnoj izbornoj komisiji BiH izjavu o odustajanju od mandata. Sljedeći kandidat na listi je Anđelko Stojanović iz reda srpskog naroda koji bi preuzimanjem mandata*

automatski (primjenom člana 10.16. Izbornog zakona) stekao pravo sudjelovanja u raspodjeli preostalih nedostajućih mandata za Dom naroda Parlamenta Federacije iz reda srpskog naroda. Da je CiK blagovremeno postupio po ostavci mandata gospodina Rošića i dodijelio mandat u kantonalnoj skupštini gospodinu Stojanoviću ne bi došlo do apsurdne situacije da izabrani zastupnik u Skupštini kantona Posavskog ne može biti delegiran u Dom naroda Parlamenta FBiH. Nadalje žalba ukazuje da povredom prava žalioca Posavski kanton će imati izabranog zastupnika iz reda bošnjačkog i hrvatskog naroda, dok će drugi kantoni biti privilegovani i imati veći broj delegata nego što je to predviđeno Uputstvom o izmjeni i dopuni uputstva o postupku provođenja posrednih izbora za tijela vlasti u BiH obuhvaćenih izbornim zakonom BiH. Predlaže da se odluke ponište, kao i Kriteriji kao dokument na kome se zasnivaju i naloži usklađivanje ovog dokumenta sa Ustavom FBiH, Izbornim zakonom FBiH i naprijed citiranim uputstvom.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbaci kao nedopuštenu jer je izjavljena u ime Skupštine Posavskog kantona i Delegata Anđelka Stojanovića i jer osporava normativne propise i zahtijeva donošenje drugih propisa koji bi išli u korist žalitelju. U suprotnom predlaže da se žalba odbije kao neosnovana jer su osporavane odluke donesene na pravilna način i u skladu sa odredbama Izbornog zakona BiH i podzakonskih akata koje je CIK donio u cilju provođenja zakona.

*Žalba nije osnovana.*

Prema stanju u spisu predmeta, Centralna izborna komisija BiH je Odlukom o potvrđivanju rezultata posrednih izbora i dodjeli mandata za Dom naroda Parlamenta Federacije Bosne i Hercegovine dodijelila mandate za 14 delegata iz reda srpskog naroda i utvrdila da nedostaju 3 delegata iz reda ovog konstitutivnog naroda. Nadalje proizilazi da nakon procedure provedene u skladu sa članom 10.10. do 10.16. Izbornog zakona BiH nedostajući mandati nisu dodijeljeni, te je Centralna izborna komisija donijela Kriterije i postupak popune nedostajućih mandata u Domu Naroda Parlamenta Federacije Bosne i Hercegovine-Opšti izbori 2018. godine (Sl.glasnik BiH br.16/19). Na osnovu navedenih kriterija Centralna izborna komisija BiH donijela je osporavane odluke kojim je mandat delegata u Domu naroda Parlamenta Federacije BiH dodijelila Lonić Mladenu i Stevanović Draganu kandidatima sa liste političkog subjekta SDP i Bosnić Nikici kandidatu sa liste političkog subjekta Srpska lista.

Odredbom člana 2.9 stav 1 tačka 2 Izbornog zakona Bosne i Hercegovine Centralna Izborna komisija BiH ovlaštena je za donošenje administrativnih propisa za provođenje zakona. Primjenom ovog propisa doneseno je Uputstvo o postupku provođenja posrednih izbora za tijela vlasti u Bosni i Hercegovini obuhvaćenih Izbornim zakonom BiH (Sl. glasnik BiH br. 34/14, 90/16, 8/17, i 91/18) koje je u članu 37 stav 3 predvidjelo da ukoliko i u ponovnom raspodjeli ne budu dodijeljeni mandati donijeće se poseban akt koji će propisati način popune nedostajućih delegata.

Budući da su bili ispunjeni uslovi propisani članom 37 stav 3 Uputstva, Centralna izborna komisija BiH je bila ovlaštena za donošenje Kriterija, pa su neosnovani žalbeni navodi političkog subjekta Posavske stranke da su odluke o dodjeli mandata zasnovane na nezakonitom dokumentu. Nadalje, iz pobijanih odluka proizilazi da je Centralna izborna komisija BiH kod dodjele mandata pravilno primjenila sve elemente propisane u Kriterijima i za odluku dala jasno i argumentovano obrazloženje, pa su neprihvatljivi svi žalbeni navodi da su pobijane odluke donesene protivno zakonu čime je neosnovan prijedlog žalitelja da se odluke ponište.

Žalbeni prijedlog da se ponište Kriteriji i postupak popune nedostajućih mandata u Domu Naroda Parlamenta Federacije Bosne i Hercegovine-Opšti izbori 2018. godine je

*nedopušten, na što Centralna izborna komisija osnovano ukazuje u odgovoru na žalbu. Ovo vijeće je žalbu odbilo imajući u vidu da je žalbu izjavio politički subjekt u svoje ime i sa ciljem poništenja donesnih odluka, pa nije bio od značaja navod žalbe koji nabraja sva lica ili subjekte čija prava su povrijeđena, kao ni žalbeni prijedlog da se poništi akt na osnovu koga su donesene odluke koje se pobijaju.*

*Vijeće je zaključilo da je neosnovan i drugi razlog osporavanja zakonitosti predmetnih odluka. Naime, činjenica da je Mato Rošić izabrani zastupnik žalitelja u Skupštini Županije Posavske odustao od mandata nema uticaja na pravilnost i zakonitost osporavanih odluka. Prije svega Centrala Izborna komisija BiH cijenila je činjenice koje su postojale u vrijeme donošenja osporavanih odluka, kada mandat u kantonalnoj skupštini nije bio dodijeljen kandidatu žalioca iz reda srpskog naroda. Nadalje, da bi kandidat na kandidatskoj listi kvalifikovanog političkog subjekta bio uzet u obzir kod popunjavanja nedostajućih delegata, potrebno da je su ispunjeni svi uslovi iz člana 2 stav 1 Kriterija. Navedena odredba osim činjenice pripadnosti redu srpskog naroda propisuje tri kriterija za popunu nedostajućih mandata koji vezuje za broj stanovnika srpske nacionalnosti u kantonu i njihov procenat u odnosu na ukupni broj stanovnika, kvalifikovanost političkog subjekta koji ima kandidata iz reda srpskog naroda na listi i broj osvojenih ličnih glasova kandidata, koji uslovi moraju biti kumulativno ispunjeni. Politički subjekt Posavska stranka ne ukazuje da kandidati kojima je dodijeljen mandat ne ispunjavaju kumulativne uslove, to navode žalbe čini neosnovanim.*

*Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.*

**PREDSJEDNIK VIJEĆA  
S U D I J A  
Sreto Crnjak**